

Prime riunion pal gnûf Cda de ARLeF

Eros Cislino: «O larìn indenant a fâ sieltis coragjosis par tutelâ la lenghe»

F resc di nomene, al è stât clamât adun, ai 15 di Novembar dal 2023, il gnûf Consei di aministrazion de ARLeF – Agjenzie regjonâl pe lenghe furlane, cun a cjâf Eros Cislino, riconfermât ae presidence dopo il mandât precedent, scomençât intal 2018. Vie pes ultimis setemanis, di fat, la Zonte regjonâl e à providût a designâ il gnûf Cda cun chestis nomenis: Manlio Boccolini, Michele De Sabata, Paolo Paron, Gabriele Zanello e tant che revisôr unic dai conts, Giovanni D'Alì.

Vie par cheste prime riunion dal Cda, Cislino al à marcât cemût che: «*Tai ultins agns o vin puartât indenant ativitâts impuartantis pe tutele de lenghe furlane. O vin fat sieltis coragjosis metudis adun intal "Plan Gjenerâl di Politiche Linguistiche 2021-2025"; un document che al à ricevût supuart di plui bandis, e che al è stât cjavât tant che esempli in plui ocasions. O partirin propit di chi, ven a stâi di chel che al è stât fat. O vin fondis saldîs che nus permetaran di olsâ ancjemò di plui tai agns denant di nô cuntun gnûf PGjPL. Un dai obietîfs al sarà sigûr chel di insaldâ ativitâts che vuê a son fundamentâls,*



Di cjampe: William Cislino, diretôr de ARLeF; Eros Cislino, president de ARLeF; Gabriele Zanello, Michele De Sabata, Manlio Boccolini, Paolo Paron, membrîs dal Consei di Aministrazion; Giovanni D'Alì, revisôr dai conts.

chês indreçadis ai plui zovins, che a son chei che a coltivaran la lenghe intal avignî. Tal passât plui resint lu vin fat intes scuclis, cun ativitâts indreçadis aes fameis, cu la presince sui social, tant doprâts dai fantats. Dome dant duçj i

struments fundamentâi aes gnovis gjenerazions, un doman chestis a podaran cjaminâ di bessolis tignint alte la bandiere de lôr lenghe. Al covente lâ indenant a lavorâ in cheste direzion, cui voi che a cjalin simpri bande il doman».